

Utunzaji Maalum wa Kondoo

Juani kwamba Bwana ndiye Mungu; Ndiye aliyetuumba na sisi tu watu wake; Tu watu wake, na kondoo wa malisho yake.—Zaburi 100:3.

Yesu anajua mahitaji ya kila kiumbe Wake na kusoma majonzi ya moyo yaliyofichika na yasiyotamkwa. Ikiwa mmoja wa walio wadogo Aliyemfia amejeruhiwa, Anaona na kumuwajibisha mwenye hatia. Yesu ni Mchungaji Mwema. Anajali kondoo Wake wasiojiweza, wagonjwa na waliopotea. Anawajua wote kwa majina yao. Huzuni ya kila kondoo na mwana-kondoo wa kundi Lake hugusa moyo Wake unaowahurumia kwa upendo, na kilio kwa ajili ya msaada kinalifikia sikio Lake. Moja ya dhambi kubwa sana za wachungaji wa Israeli ni ile iliyooneshwa na manabii: “Wagonjwa hamkuwatia nguvu, wala hamkuwaponya wenye maradhi, wala hamkuwafunga waliovunjika, wala hamkuwarudisha waliofukuzwa, wala hamkuwatafuta waliopotea; bali kwa nguvu na kwa ukali mmewatawala. Nao wakatawanyika, kwa sababu hapakuwa na mchungaji.... wala hapakuwa na mtu aliyewaulizia, wala kuwatafuta”....

Akiwa kama Mungu Anatumia nguvu kwa niaba yetu, wakati ambapo kama Kaka yetu Mkubwa anaguswa na masikitiko yetu yote. Bwana wetu wa mbinguni hakujitenga mbali na wanadamu walioanguka na wenye dhambi. “Kwa kuwa hamna kuhani mkuu asiyeweza kuchukuana nasi katika mambo yetu ya udhaifu; bali yeye alijaribiwa sawasawa na sisi katika mambo yote, bila kufanya dhambi....

Utakuwa na matatizo mengi ya kukabiliana nayo katika maisha yako ya Kikristo kuhusiana na kanisa, lakini usijaribu sana kuwanyoosha ndugu zako. Ukiona kwamba hawafikii matakwa ya Neno la Mungu, usiwashutumumu; wakikuchokoza usilipe kisasi. Pale mambo yatakayokuudhi yanaposemwa, kwa utulivu tunza nafsi yako isitaabike.... Unalazimika kufanya kazi kwa ajili ya wakosaji kwa moyo uliotiishwa, uliotulizwa na Roho wa Mungu, na kumwacha Bwana afanye kazi kupitia kwako, wakala Wake. Mtwike Bwana Yesu mzigo wako. Unahisi kwamba Bwana anapaswa kufanyia kazi pale ambapo Shetani anajitahidi kutawala juu ya baadhi ya roho; bali unapaswa kufanya kile uwezacho kwa unyenyekevu na upole, na kuikabidhi kazi iliyovurugika, mambo magumu, mikononi mwa Mungu. Fuata maelekezo katika Neno Lake, na uache matokeo yake katika utendaji wa hekima Yake. Ukishafanya yote uwezayo kumwokoza nduguyo, acha kusumbuka, na uendelee kwa utulivu na majukumu mengine muhimu. Si kazi yako tena, bali ni ya Mungu.

Kwa kukosa subira, usikate fundo la ugumu, ukifanya mambo yasiwe na matumaini. Mwache Mungu akufungulie nyuzi zilizofungwa kwa ajili yako. Ana hekima ya kutosha kuyamudu matatizo ya maisha yetu. Yeye ayajua yote na ni Mtendaji mwema. Hatuwezi daima kuona mipango Yake; ni lazima tungojee kwa subira ili Ayafunue na tusiharibu na kuyapoteza. Atatufunulia sisi kwa wakati wake mzuri. Tafuta umoja; kukuza upendo na kufanana na Kristo katika mambo yote. Yeye ni chanzo cha umoja na nguvu.... Ikiwa utafanya kama Mungu anavyotaka ufanye, baraka Zake zitakuja katika kanisa (**Testimonies for the Church 5:346-348**).